

Cartë nabëquë'ë San Pablo lu ra Gálatas

**Bëquë'ë Pablo cartë rë' lu shmënë
Dios naquërelde Galacia**

1 Na Pablo nahia poshtë, tubi nagulé Dios. Lédëdi'i gulé mënë na sino bëshel'dë Jesucristo na. También Dios Shtáda'a, el quë nabëldishté Jesucristo ladi ra tégulë, bëshé'ldi' na. Gulé më na ziquë poshtë. ²Na con grë ra narialdí ldu'i shti'dzë Jesucristo, ra naquëreldeñú na ndë'ë, rquë'ë na'a cartë rë' parë grë ra grupë shtë shmënë Dios, grë të naquërelde regiuni shtë Galacia. ³⁻⁴Rac shtua'a guëshel'dë Dios grë bendición shtëhi' nu cuedchí ldu'u të por lë'ë më, Shtáda'a nu por Jesucristo, Shláma'a, el mizmë Jesús nabë'në entregar mizmë lé'i' lu galguti parë guëdchisú më duldë shtë hia'a nu parë guelá më lë'ë hia'a lu mal shtë guédchiliu. Ni na voluntá shtë Dios, Shtáda'a. ⁵Llëru'bë na Dios parë siemprë. Amén.

**Tubsë nezë nanú parë
gac salvar mieti**

⁶Nalé rdzëguë' ldua'a de quë lë'ë të quëgsa'në të shti'dzë Dios; nasesë rëazë guetë të lu shnezë më, el quë naguna'bë lë'ë të parë gac të

shmënë më. Guna'bë më lë'ë të parë gunë të recibir favurë shtë Cristo, parë iurne' ziagla'guë të stubi nezë. Rialdí ldu'u të di'dzë naná cambi, lédëdi'i diza'quë shtë më. ⁷Pues nídi'i stubi diza'quë shtë salvaciuni. Es quë bèldá mënë quëglua'a rall lë'ë të di'dzë gurënë nu rza ldu'u të ra di'dzë nabëluá'ahia. Rac shtu'u rall gac cambi diza'quë shtë Cristo ⁸perë si talë tubi mënë u mizmë na u tubi ianglë naze'dë de gube'e, si talë guëluá'all lu të stubi diza'quë de lo quë nabëlua'a na'a lu të, pues nacondenádëll. ⁹Gulé bësëgná ldu'u të lo quë naguni'i na'a lu të antsë; quëgní'ihia stubi vësë más, si talë chu guëlua'a stubi clasë diza'quë nanádi'i diza'quë lo quë nabë'në të recibir, Dios gunë cashtigu lë'ëll. Tsall gabildi catë nídi'i fin.

¹⁰Gulé guni'i lua, çpë quëhuna lo quë narac shtu'u mënë u lo quë narac shtu'u Dios? ¿Pë quëhuna lo quë narëuu' ldu'u mënë? Si talë rac shtua'a nihuna narac shtu'u nguii, adë nádi'ihia muzë shtë Cristo.

**Dios guna'bë Pablo ziquë
poshtë shtë më**

¹¹Lë'ë të naná rialdí ldu'i Dios, rac shtua'a gac bè'a të lë'ë

diza'quë nabëna predicar lu të, adë guzublugin por pudërë shtë nguii.

¹²Adë bëna recibirin de nguii; adë chu bëluá'adi'in na, perë mizme Jesucristo bëluá'ai' shtí'dzi' na.

¹³Lë'ë të hia bini të lla guc vidë shtëna antsë iurë guanalda religiuni shtë ra më israelitë. Hia nané të lla bëzac zia ra mënë; guzunalda con fuersë ra grupë shtë shmënë Jesús parë guédë'a fin obrë shtë Jesús. Guc shtua'a tsaluhin. ¹⁴Lu religiuni shtë israelitë, guca más adelantadë quë grë sahia. Bëna cumplir con ra creenci ni más quë ra sahia de mizme edá. Nalé guc shtú'uhia gunë mieti cumplir ra custumbrë shtë shtadë guëluhia ¹⁵perë gulé Dios na antsë lë'ë na gala. Nalé guc shtu'u më na nu bé'ni' tubi favurë; gulé më na parë guënahia lu shini më ¹⁶nu guna'bë më na parë cuzënú shini më na, nu parë guna predicar diza'quë shtë Jesús lu ra mënë nanádi'i më israelitë. Lë'ë tiempë nabë'në më ra cusë ni, ni tubi adë chu lu guagna'bë dí'dzëdia'a; adë guagni'inúdia'a mënë shcuendë ra cusë ni. ¹⁷Adë guádia'a Jerusalén niagnahia ra mënë naná poshtë antsë de na, sino guahia regiuni shtë Arabia. Despuësë bëabría Damasco.

¹⁸Gudëdë tsunë izë despuësë de guca shmënë Jesús, iurní guagnahia lu Pedro nananú Jerusalén. Guquërdënuhia lé'i' che'ni dzë.

¹⁹Adë gunádia'a lu chu stubi poshtë, sulë gunahia Jacobo naná bëchi Dadë Jesús. ²⁰Runa segurë delantë de Dios lo quë naquëquëa'a ndë'ë nahin verdá.

²¹Despuësë de guahia Jerusalén, guahia regiuni shtë Siria nu Cilicia.

²²Ra grupë shtë shmënë Jesús naquërdë regiuni shtë Judea, adë bënguë bé'adi'i rai' na ²³sulamëntë bini rai' lo quë naguni'i mënë de na, de quë lë'ë nguii naguzunaldë ra shmënë Jesús; guc shtú'ull guédé'ëll fin parë diza'quë, perë iurne' quëhúnëll predicar shti'dzë Jesús. ²⁴Zni guni'i rall nu guni'i rall nalé llëru'bë na pudërë shtë Dios.

Ra poshtë bë'në rai' recibir Pablo

2 Despuësë de gudëdë chidá izë, guahia stubi vueltë Jerusalén con Bernabé nu biahia Tito. ²Guahia ndë purquë Dios bëlua'a më de quë napë quë tsahia Jerusalén. Ndë bédëa ra mënë naná encargadë con shchi'ni Jesús. Lu rai' biadi'dza diza'quë naquëhuna predicar lu mënë nanádi'i më israelitë. Bëna zni parë gac bé'ahia si talë na rai' de acuerdë con shchi'nia u si talë biadi'dza de baldë. ³Perë ni siquierë adë bé'nëdi'i rall obligar gac circuncidar Tito, u sea guëriuguë cuerpë shtëhi' nu náhi' më griego. Nunúhi' na iurní. ⁴Dzë ni bëldá sa' na'a falsë bédchini ndë; guaté rall ladi na'a llga'chi parë quëgl'da'chi rall lla dzúdë'në na'a, si talë napë na'a libertá por Cristo u si talë zianaldë na'a tëchi ra custumbrë. Guc shtu'u rall guëabré na'a stubi, niac na'a ziquë tubi naná bajo ordë shtë religiuni shtë rall. ⁵Perë ni tubi mumëntë adë chu bédé'ëdi'i lugar parë niua'a rall lë'ë na'a parë nezë ni të gac bë'a të diza'quë nabë'në të

recibir nahin verdá; nunquë adë gac cambin.

⁶Ra narnibë'a entrë lë'ë rai', adë guní'idi'i rai' di'dzë cubi ziquë mandadë tē guna cumplir. Parë na adë rúnëdi'i importë chu na rai' purquë Dios adë rúnëdi'i më juzguë según lo quë narlua'a mieti por fuërë. Quëhuna repetir, ra narnibë'a entrë lë'ë rai', bé'nëdi'i rai' obligar guna cumplir lëy nabëdë'ë Dios lu Moisés. ⁷Al contrari iurë gac bë'a rai' de quë bë'në më incarguë lë'ë na con diza'quë parë guëni'inuhia lu ra mënë nanádi'i më israelitë, gac rall cunformë. Gac bë'a rall de quë bëshe'ldë më na igual ziquë bëshe'ldë më lë'ë Pedro tē guadi'dzë Pedro diza'quë lu ra më israelitë. ⁸Pues mizmë Dios nabëshe'ldë lë'ë Pedro ladi ra më israelitë bëshe'ldë më na ladi ra nanádi'i më israelitë. El quë nabë'në compa'ni Pedro parë gúni' zihani milagrë, también bë'në më ni compa'ni na. ⁹Jacobo nu Pedro nu Juan na rai' ziquë më principal entrë ra shmënë Jesús; gac bë'a rai' de quë Dios gulë më na nu bëshe'ldë më na lu dchi'ni shtë më. Gac rai' cunformë nu guré rai' de acuerdë con na nu Bernabé. Bëne'e rai' sí de quë Bernabé nu na tsagni'inú na'a lu ra mënë nanádi'i më israelitë nu lë'ë rai' guëa'në rai' con shchi'ni Dios entrë ra më israelitë. ¹⁰Sulë tubi cusë bë'në rai' incarguë de quë guëdë'në na'a ayudë parë ra prubi. Zni gac shtu'u na'a guëdë'në na'a dizdë más antsë.

Pablo guni'i guëc Pedro iurë nanú rai' guë'dchi Antioquía

¹¹Iurë Pedro gua ciudá Antioquía, gunia'a guëc Pedro delantë lúhi' lo

quë naquëhúni' adë nazá'quëdi'in.

¹²Primëre gudaunúhi' con ra nanádi'i më israelitë perë iurë bëdchini mënë nabëshe'ldë Jacobo, bëazë guetë Pedro; adë guagla'guë niaunúhi' con ra më griego. Bëdzëbë Pedro lu ra naze'dë purquë na rai' më israelitë naquëhunë cumplir custumbrë riuguë partë delicadë shtë me'dë. ¹³Nu los de más më israelitë ndë, bëa'në rall de acuerdë nabë'në Pedro hashtë también Bernabé guzublú tsaldí ldu'u shti'dzë rai'. Bësiguë rall lë'ë Bernabé con devociuni falsë shtë rall. ¹⁴Iurë gunahia hiadë ziazúdi'i rai' de acuerdë con verdá shtë diza'quë, gunia'a lu Pedro delantë grë rall: “Lé'ël nal më israelitë nu guquërdël ziquë ra mënë nanádi'i më israelitë. Bësá'nël custumbrë shtë më israelitë. ¿Pëzielú rúnël obligar ra nanádi'i më israelitë guëbani rall ziquë më israelitë?”

Nasalvára'a sulë por fe

¹⁵Lë'ë na'a na na'a më israelitë; shtadë na'a na rai' më israelitë. Nádi'i na'a ziquë los de más pëcadurë nanádi'i më israelitë ¹⁶perë rac bë'a na'a de quë ni tubi nguü gáquëdi'i më za'quë delantë lu Dios por quëhunë nguü cumplir lëy shtë Moisés. Nané na'a gac salvar nguü sulë si talë tsaldí ldu'u nguü shti'dzë Jesucristo. Por ni zac lë'ë hia'a rialdí ldu'u hia'a shti'dzë Cristo Jesús. Sulë por ni tubldí na shcuénda'a lu Dios. Adë rialdídi'i ldu'u hia'a por gunë mieti cumplir lëy, gac salvar mënë purquë ni tubi chu gunë gan gac tubldí shcuéndi' lu Dios por rúnëll cumplir lo quë

narni'i lëy. ¹⁷Hia gunia'a na hia'a më za'quë delantë lu Dios sulë purquë rialdí ldu'u hia'a nu gunia'a rqui'ni gac bè'a hia'a nápa'a duldë igual ziquë los de más pecadurë. ¿Gu runë cuntienë di'dzë rë' de quë Cristo rsini lë'ë hia'a lu duldë parë gac bè'a hia'a nadápa'a duldë? Aquëdi'i. ¹⁸Si talë tsanalda nezë nabësa'na antsë parë guëabría guna cumplir ra custumbrë, iurní de verdá napa faltë ¹⁹purquë na, hia gutia parë lëy guahietë; adë quëhúnedia'a confiar lë'ë lëy parë guëbania tubi vidë narëuu' ldu'u Dios. ²⁰Hia vidë gushë gualú con Cristo lu cruz. Lë'ë duldë adë rnibé'adi'in na iurne', sino Cristo bëne'e vidë cubi nu rnibë'a më na. Vidë cubi nanapa iurne' la'ni guédchiliu, napa por pudërë shtë shini Dios purquë rialdí ldua'a shti'dzë më, el quë narac shtu'u na nu gúti' shlugara lu cruz. ²¹Adë quëquë guiá'adia'a favurë nabë'në më parë gac salvara. Si talë na posiblë gac salvar mieti por gunë rall cumplir lëy, iurní shldi guti Cristo. Sulë por galguti shtë më quëhunë Dios recibir lë'ë hia'a ziquë mënë naná tubldí shcuendë lu më, u sea mënë nanápëdi'i faltë delantë lu më.

Nasalvára'a por fe, lédëdi'i por lëy

3 Lë'ë të naquërdë Galacia, lë'ë të nadë rúnëdi'i llgabë, ¿chull bësiguë lë'ë të, të parë bëazë guetë të shnezë Dios? Lu të biadi'dzë na'a diza'quë de quë Cristo guc crucificári'. Clarë riasé të guti më lu cruz. ²Iurne' gulë guni'i lua ¿gu bè'në të recibir Espíritu

Santo shtë Dios purquë bè'në të cumplir lëy shtë Moisés u purquë rialdí ldu'u të diza'quë shtë Jesús? ³¿Gu na verdá na të mënë nadë rac bé'adi'i? Guzublú vidë cubi shtë të por Espíritu Santo; tubsë cusë bè'në të; gualdí ldu'u të shti'dzë më perë iurne' rni'i të rqui'ni gunë mieti cumplir lëy shtë Moisés parë gac salvar të. ¿Pë adë rac bé'adi'i të iurne' ⁴u shldi bè'në të sufrir zihani cusë durë? Pues guquin embanë si talë tsagla'guë të tëchi custumbrë guahietë. ⁵Iurë bédë'ë Dios Espíritu Santo nu quëhúni' milagrë entrë lë'ë të ¿gu runë mëhin purquë rianaldë të tëchi lëy u sulë purquë rialdí ldu'u të shti'dzë më?

⁶Guná, Abraham guquërdí' antsë de Moisés. Gualdí ldu'u Abraham shti'dzë Dios nu guná më fe shtë Abraham nu bè'në më tratë Abraham ziquë nguui za'quë delantë lu më. ⁷Por ni rac bè'a hia'a sulë el quë narialdí ldu'i shti'dzë Dios na rall ziquë shini Abraham delantë lu më. ⁸Zni Sagradas Escrituras guni'i dizdë más antsë de quë ra mënë nanádi'i më israelitë, gunë më recibir lë'ë rall si talë rialdí ldu'u rall shti'dzë më. Por ni guni'i më lu Abraham diza'quë rë': "Gunë ldahia grétë' mënë shtë guédchiliu por lë'él". ⁹Zni grétë' el quë narialdí ldu'i shti'dzë Dios, quëhunë ldai' më lë'ë rai' purquë napë rall mizmë fe quë Abraham.

¹⁰Grë ra narni'i napë quë gunë cumplir grë puntë shtë lëy parë gac salvar mënë, nacondenadë rall purquë naescritë zndë'ë: "Grétë' nadë gúnëdi'i cumplir grë puntë lo quë naná escritë la'ni librë shtë

lëy, nudé rall”. ¹¹Clarë nahin de quë ni tubi adë chu naperdunë lu Dios por bé'nëll cumplir mandamientë shtë lëy purquë Espíritu Santo rni'i la'ni Sagradas Escrituras: “Sulë el quë narialdí ldu'i shti'dzë Dios gunë më recibir cumë mëné naná tubldí shcuéndi' lu Dios. Nápëll vidë sin fin.” ¹²El quë narunë confiar de quë por gúnëll cumplir lëy por ni tubldí na shcuéndëll lu Dios, pues nguii ni adë rialdídi'i ldu'i shti'dzë Dios purquë naescritë: “El quë narunë cumplir grë puntë shtë lëy, gápëll vidë sin fin ziquë tubi premi”.

¹³Cristo bëlá lë'ë hia'a lu sentënci nabësëdchini lëy. Lë'ë lëy bën'ë condënar lë'ë hia'a lu galguti, perë Cristo gudilli parë gac salvára'a. Lë'ë më gúqui' ziquë tubi cusë nanudé por duldë shtë hia'a. Sagradas Escrituras rni'i: “Nacondënadë por Dios grë el quë naquë lu tubi hiaguë”. ¹⁴Guti Cristo Jesús parë gac cumplir promësë naguni'i Dios lu Abraham. Por Jesús bën'ë l dai' Dios ra mëné nanádi'i israelitë nu bëdchini Espíritu Santo parë cuzënúhi' lë'ë hia'a sulë purquë rialdí ldu'u hia'a shti'dzë më.

Promësë shtë Dios nu lëy

¹⁵Lë'ë të naná rialdí ldu'i diza'quë, quëgnia'a lu të tubi comparaciuni naze'dë la'ni vidë shtë mieti. Iurë tubi nguii runtsá'ull tëtë, si talë bé'nëll firmarin, ni tubi adë chu guëtí'idi'in, nilë gúnëll cambiarin. ¹⁶Dios bën'ë tubi promësë lu Abraham nu zac parë tubi llëbni Abraham. Sagradas Escrituras rni'i “parë zihani llëbni

Abraham” si fuërë zihani mëné, sino rni'i Sagradas Escrituras: “tubsë llëbni”; quiere decir tubsë nguii. Nguii ni na Cristo. ¹⁷Lo quë narnia'a lu të es quë Dios bëd'ë tubi promësë lu Abraham nu bën'ë më firmarin con mizmë di'dzë shtë më. Bëd'ë më lëy lu Moisés tapë gahiu'a galdë bë chi izë despuësë de Abraham, perë lëy ni adë bëtí'idi'i promësë nabëd'ë Dios lu Abraham. ¹⁸Si talë bendición shtë Dios na por gunë mieti cumplir lëy, iurní adë nádi'in por tubi promësë sino tubi premi; perë bën'ë Dios prometer lu Abraham sulë ziquë tubi favurë shtë më.

¹⁹Iurnétia'a, ñpëzielú bëd'ë Dios ra mandamientë parë ra mëné? Bëd'ë Dios mandamientë parë gac bë'a hia'a de quë na hia'a pecadurë. Lë'ë lëy napë pudërë hashtë bëdchini lë'ë llëbni Abraham. Zni bën'ë Dios prometer lu llëbni Abraham. Ra ianglë shtë Dios be'dë guës'a'në lë'ë lëy nu bën'ë rai' incarguë lëy lu Moisés, el quë nazú guéláu entrë Dios nu mëné. ²⁰Perë iurë bën'ë më prometer lu Abraham, adë ni chu zuga'adi'i guéláu. Sulë Dios con Abraham; tubldí bëdchini shti'dzë më lu Abraham.

Bëd'ë Dios ra mandamientë

²¹Iurní rna'bë di'dza ñquëhunë lëy shtë Moisés cuntrë promësë shtë Dios? Aquëdi'i. Si talë lë'ë lëy napë pudërë parë guëd'ëin vidë eternë parë lë'ë mieti, iurní gac tubldí shcuendë mieti por guëzu'bë diaguë rall puntë shtë lëy. ²²Perë Sagradas Escrituras rni'i de quë grët'ë mëné napë rall duldë; na rall culpablë

delanté lu Dios. Zni guc voluntá shtë më parë grë mieti tsasé rall vidë eternë ze'dë de Dios parë grë naná rialdí ldu'i shti'dzë Jesucristo, lédëdi'i nasalvar mieti por ra mandamientë.

²³Antsë de guëdchini diza'quë shtë Jesús, lë'ë hia'a na hia'a ziquë präsi bajo ordë shtë lëy. Lë'ë lëy gunibë'a lë'ë hia'a hashtë iurë lë'ë Cristo bédchini. ²⁴Ziquë tubi criadë na encargadë parë quëhápëll tubi llguë'në, zni guc lëy parë lë'ë hia'a. Guc bë'a hia'a pë na mal nu pë na bien por lëy, perë hia bédchini Cristo. Por Cristo tubldí na shcuénda'a lu Dios sulamëntë purquë rialdí ldu'u hia'a shti'dzë më. ²⁵Hia iurne' cumë bédchini diza'quë shtë Jesús, adë nádí'ia'a ziquë lë'ë llguë'në shtë comparaciuni; adë nádí'ia'a bajo ordë shtë mandamientë.

²⁶Grë hia'a na hia'a shini Dios por Cristo Jesús si talë rialdí ldu'u hia'a de verdá. ²⁷Grë të nabëriubë nisë ziquë shmënë Jesús, napë të vidë shtë më; unidë na të con lë'ë më. ²⁸Grë ra mënë naná unidë con Jesús, na ziquë tubsë cuerpë. Hia nádí'i importë si talë nal më israelitë u më griego; u si talë nal bajo ordë shtë sa'l u si talë nápël libertá; u si talë nal nguüu u nal na'a. ²⁹Si talë nal shmënë Cristo pues iurní nal llëbni Abraham nu grë lo quë nabë'në më prometer lu Abraham, lë'ë të zac napë të.

4 Lo quë naquëgnia'a lu të nahin cumë ziquë tubi llguë'në nangunë recibir tubi herenci. Guti ra shtadë llguë'në nu todavía nall llguë'në. Nall

ziquë tubi muzë narunë dchi'ni; rnibé'adi'll lë'ë herenci nabë'nëll recibir, perë en verdá lë'ë llguë'në nashtënë herenci ni. ²Nanú mënë nacanihapë ra cusë shtë llguë'në; nanú ra naná encargadë con herenci ni hashtë guëga'a iurë nagoni'i shtadë llguë'në, iurní lë'ëll guëná'zill herenci. ³Zni na con lë'ë hia'a; antsë na hia'a ziquë llguë'në shtë comparaciuni. Bëzu'bë diága'a enseñansë nu custombrë shtë ra mënë guë'dchiliu ⁴perë iurë bëga'a tiempë nabë'në Dios disponer, bëshel'dë më shini më lu guë'dchiliu. Bédchini' por tubi na'a nu bë'në tucarë gúni' cumplir puntë shtë lëy purquë náhi' më israelitë. ⁵Bédchini' parë gúni' librar lë'ë hia'a lu lëy nabë'në condenar lë'ë hia'a. Zni bëne'e më dereché të guëdé'na'a recibir libertá ziquë shini më.

⁶Na të shini më; por ni bëshel'dë më Espíritu Santo parë cuzënúhi' lë'ë të. Por lë'ë Espíritu Santo rni'i hia'a lu Dios: "Shtadë na'a". ⁷Por ni na të shini Dios, lédëdi'i bajo ordë shtë custombrë. Por naná të shini Dios, guëne'e më tubi herenci purquë unidë na të con Cristo.

Runë llgabë Pablo por ra shmënë Jesús

⁸Antsë lë'ë të adë gunëdi'i të Dios; dzë ni na të bajo ordë shtë ra dios naguctsa'u. Bëzu'bë diaguë të voluntá shtë ra dios nananú lu guë'dchiliu perë de verdá nádí'i rai' Dios. ⁹Perë iurne' nané të Dios verdadërë; más bien quëgnia'a lu të, Dios runguë bë'a më lë'ë të ziquë shini më. ¿Pëzielú bëabrí të stubi lu

nezè gushè, lu règlè nu custumbrè nanápèdi'i pudèrè? ¿Gu rac shtu'u tè gunè tè obedecer ra cusè ni ziquè tubi nanali'bi con ra custumbrè? ¹⁰¿Pèzielú todavía rialdí ldu'u tè nanecesari gunè tè cumplir ra dzè delicadè, u dzè shtë villili, u ra dzè shtë laní, u gunè tè cumplir custumbrè shtë izè según rni'i lèy? ¹¹Na rdzèba de què bèna dchi'ni entrè lè'è tè de baldè.

¹²Lè'è tè naná rialdí ldu'u shti'dzè Jesús, na quèhuna ruèguè lu tè de què gac tè libré ziquè na. Antsè guanalda tèchi ra custumbrè, perè bèaca shmènè Cristo ziquè na tè iurne'. Lè'è tè siemprè bè'nè tè tratè na bien lédèdi'i manèrè mal. ¹³Nané tè primèrè vèsè biadi'dza diza'què lu tè, guquèrèldènúa lè'è tè purquè guc llú'uhia. ¹⁴Galguidzè ni guc tubi cusè dushè parè lè'è tè perè adè bè'nèdi'i tè desprèci na; adè bèquè guíá'adi'i tè na sino al contrari, bè'nè tè recibir na ziquè tubi ianglè shtë Dios u ziquè mizmè Cristo Jesús. ¹⁵¿Pè bèa'ldè ldu'u tè de què tiempè naguquèrèldènúa lè'è tè, nalé bèquitè ldu'u tè? ¿Pè guc iurne'? Pues nahia testigu de què si fuèrè posiblè, na tè dispuestè niane'le tè prupi slu tè shlugar slua. ¹⁶Perè ne' ¿gu rni'i tè de què quèhuna cuntrè lè'è tè iurè ruadi'dza lu tè verdá? ¹⁷Ra mènè narianaldè tèchi lèy, rac shtu'u rall gac tè shmènè rall, perè lédèdi'i parè bien shtë tè sino rac shtu'u rall tsanaldè tè tèchi enseñansè shtë rall parè despuèsè gunè nadchini rall na tè shmènè rall. ¹⁸Parè na naza'què rac shtu'u mènè ni lè'è tè perè sulè si talè na

parè bien shtë tè. Zni rac shtua'a guèdubi tiempè, lédèdi'i sulamèntè iurè naquèrèldènúa lè'è tè. ¹⁹Lè'è tè narac shtua'a, ziquè tubi na'a quèzac zi lu dulurè iurè guèdchini me'dè lu gué'dchiliu, quèhuna sufrir stubi vèsè más hashtë conductè shtë tè na de acuerdè con voluntá shtë Cristo. ²⁰Rac shtua'a niabèzènúa lè'è tè iurne' parè guadi'dza lu tè stubi mudè. Pues adè rac bè'adia'a pè guna con lè'è tè iurne'.

Comparaciuni shtë Agar nu Sara

²¹Lè'è tè narac shtu'u guèabrí tè parè tsanaldè tè tèchi lèy, gulè guni'i lua ¿gu adè riasèdi'i tè lo què narni'i lèy? ²²Naescritè la'ni Sagradas Escrituras de què gupè Abraham chupè llguè'nè; túbill nall shini tubi na'a narunè sirvè la'ni hiu'u shtë Abraham; stubi llguè'nè gulè por tse'lè Abraham. ²³Lè'è shini criadè gulè ziquè grè llguè'nè, perè llguè'nè nagupè tse'lè Abraham, gúli' cumè milagrè. Bè'nè mè prometer guèdè'è mè tubi shini rai' aunquè tse'lè Abraham na mè gushè. ²⁴Ni na ziquè tubi comparaciuni. Guèrupè ra na'a ni quèhunè rai' representar chupè conveñi entrè Dios nu mènè. Tubi conveñi ze'dè dizdè dani shtë Sinaí catè bèdè'è mè lèy parè Moisés. Agar runè representar lèy ni. Grètè' ra narianaldè tèchi lèy, na rall shini Agar nu na rall bajo ordè shtë lèy. ²⁵Agar na ziquè dani Sinaí nananú Arabia. Rúni' representar ra naquèrèldè ciudá Jerusalén iurne'. Na rall bajo ordè shtë lèy. ²⁶Perè nanú stubi Jerusalén naze'dè

de gube'e. Librè na mènè ni. Na rall librè de custumbrè nu règlè shtë nguiu. Jerusalén ni na ziquè shni'a hia'a ²⁷purquè Sagradas Escrituras rni'i:

Bèquitè ldu'ul, lè'èl nagúpèdi'i shínil.

Bèquitè ldu'ul nu guni'i fuertè labansè parè Dios.

Lè'èl nadè nápèdi'i shínil, bèquitè ldu'ul purquè lè'è na'a nanápèdi'i tsé'li' gápèll más shíni' què lè'è na'a nanapè tsé'li'.

²⁸Perè lè'è hia'a naná rialdí ldu'i Jesús, na hia'a ziquè Isaac. Na hia'a shini Dios por tubi promèsè naguni'i mè. ²⁹Iurne' ziquè tiempè shtë Abraham, lè'è shini nagulè ziquè grè mènè, guzunáldèll naná shini nagulè por pudèrè shtë Espíritu Santo. Igual quèhunè mènè iurne'; ra mènè narianaldè tèchi lèy, quèzac zi rall shmènè Dios.

³⁰Perè çpè rni'i Sagradas Escrituras shcuendè ra cusè ni? Rni'in: "Gulú lè'è na'a narunè dchi'ni lídchil con shíni' purquè adè gúnèdi'i tucarè ca'a shini na'a ni herenci juntè con shini shtë legítimè tse'lè Abraham".

³¹Zni nahin; lè'è tè naná rialdí ldu'i Jesús, adè na hia'a ziquè shini Agar el què naguc criadè shtë Sara. Adè rianáldèdi'ia'a tèchi custumbrè shtë lèy, perè rialdí ldu'u hia'a promèsè shtë Dios. Na hia'a shini Sara nanapè libertá.

Gulè tsanaldè neze shtë Dios

5 Bèlá Cristo lè'è hia'a parè gápa'a libertá. Adè nádi'i hia'a bajo ordè shtë lèy iurne'. Por ni gulè gac firmè lu libertá nabène'e mè nu

adè guèdè'èdi'i tè sí guè nibè'a lèy shtë mènè lè'è tè stubi.

²Gulè bèquè diaguè naquègnia'a lu tè. Na Pablo, quègnia'a si talè rialdí ldu'u tè nanecesari riuguè cuerpè shtë tè parè gac salvar tè, iurní quèquè guiá'al shti'dzè Cristo; iurní lo què nabè'nè Cristo adè lasáquèdi'i parè lè'èl. ³Rac shtua'a guènia'a lu tè stubi, de què grè mieti narialdí ldu'i custumbrè shtë galiuguè cuerpè shtë nguiu, lè'è rall napè què gunè rall cumplir grè puntè shtë lèy nabèquè'è Moisés.

⁴Lè'è tè naná rialdí ldu'i de què gunè mè recibir lè'è tè por quèhunè tè cumplir lèy, adè nádi'i tè unidè con Cristo. Lè'è tè bèsèa'nè tè shnezè Dios. Nídi'i mudè gunè mè favurè tè gac salvar tè. ⁵Lè'è hia'a dzuléza'a dzè nagunè mè cambiar lè'è hia'a tè gáca'a mènè za'què delantè lu Dios. Rialdí ldu'u hia'a lè'è mè nu gaquin por Espíritu Santo shtë mè. ⁶Si talè unidè na hia'a con Cristo, adè lasáquèdi'i si talè bé'nèl cumplir custumbrè shtë galiuguè cuerpè u adè bé'nèdi'il cumplirin. Lo què nalasac lu Dios na si talè rialdí ldu'u hia'a shti'dzè mè de verdá nu si talè por fe rac shtu'u hia'a sa' hia'a.

⁷Bien guzublú guna'zi tè shnezè mè perè çchu guluguè lè'è tè parè adè rzu'bè diaguèdi'i tè shti'dzè Dios? ⁸Ldai' nabèlua'a nguiu ni con tantè ánimo, adè zé'dèdi'in de Dios, el què nagulè lè'è tè. ⁹Ldai' shtë rall na ziquè levadurè nu nanú tubi dichè narni'i: "Du'pè levadurè rshepin guèdubi nacubè". ¹⁰Napa confiansè de què lè'è Dadè Jesús adè guèsá'nèdi'i mè tsaldí

ldu'u të stubi di'dzë, sulë lo quë nabëluá'ahia lë'ë të, ni sí, tsaldí ldu'u të. El quë narsini ldu'u të stubi nezë, gunë Dios cashtigu lé'ëll; adë nídi'i importë si talë nall më ru'bë u si adë nádi'll më ru'bë entrë lë'ë të.

¹¹Ra mësë falsë cagni'i rall de quë quëhuna predicar custumbrë shtë galriuguë cuerpë të gac salvar mieti, perë si talë na todavía quëgnia'a lu të de quë nanecesari chuguë cuerpë shtë të parë gac salvar, ÷pëzielú rzunaldë ra më israelitë na? Si talë nahin ziquë rni'i rall, adë nialdédi'i rall por diza'quë narni'i sulë por galguti shtë Jesús lu cruz gac salvára'a. ¹²Rac shtua'a de quë ra narsiguë lë'ë të con enseñansë ni chuguë cuerpë rall hashtë más todavía ziquë runë mënë nadë guënëdi'i Dios.

¹³Lë'ë të naná rialdí ldu'i shti'dzë Jesús, gulë më lë'ë të parë napë të libertá, perë lédédi'i parë gunë të duldë. Más bien gulë bè'në sirvë lu sa' të con amor. ¹⁴Gunë të cumplir guëdubi lëy shtë Dios si talë guëzu'bë diaguë të tubsë mandamientë narni'i: "Gulë gac shtu'u sa'l ziquë rac shtú'ul mizmë lé'ëll". ¹⁵Perë si talë lë'ë të rdildi të ziquë ra ma, rahuë' ma sa' ma; gulë gapë cuidadë no sea guëshi'ni të shchi'ni Dios ndë.

Lo quë narac shtu'u ldu'u nguiu nu lo quë narac shtu'u Espíritu Santo

¹⁶Lo quë narnia'a lu të na zndë'ë: gulë gubani según narni'i Espíritu Santo. Si talë rianaldë të tëchi Espíritu Santo, adë gúnël cumplir deseo mal nananú la'ni ldú'ul

¹⁷purquë grë ra deseo mal, nahin cuntrë Espíritu shtë Dios nu lë'ë Espíritu na contrari shtë deseo mal; deseo mal nahin contrari shtë Espíritu. Por ni adë gáquëdi'i gunë të ra cusë narac shtu'u të ¹⁸perë si talë guësa'në të quëgsé Espíritu Santo lë'ë të, iurní lë'ë lëy nápëdi'in pudërë parë gunin condenar lë'ë të.

¹⁹Clarë rlu'a'a ra deseo mal nananú la'ni ldu'u mieti. Rquënú rall tselë mënë. Nabani rall ziquë mbecu. Napë rall vici. ²⁰Runë rall adorar stubi cusë, lédédi'i sulë Dios. Rialdí ldu'u rall galbëlliú. Napë rall llanë la'ni ldu'u rall. Rdildinú rall sa' rall. Napë rall mbidi. Na rall më dishi'bi; rëuu' ldu'u rall iurë nanú divisioni. ²¹Celosë na rall; rdchisú rall pë shtë mënë. Rguini rall mënë. Rzuu'dchi rall. Nalé rau sha'të rall. Runë rall stubi ra cusë nanadë rlluí'idi'i, runë rall ziquë mamflor; perë grë mënë ni, quëgnia'a lu të iurne' igual ziquë hia gunia'a lu të antsë, el quë narunë ra cusë rë' adë nídi'i mudë tsutëll lugar catë rribë'a Dios.

²²Perë lo quë narunë Espíritu la'ni ldu'u el quë narialdí ldu'i shti'dzë më na zndë'ë: rac shtú'ull sa'll. Rquitë ldú'ull. Rbedchí ldú'ull. Nápëll pacënci con sa'll. Ráquëll më za'quë. Rúnëll cumplir shtí'dzëll. ²³Nadú'ull. Quëhápëll el mizmë lé'ëll të gúnëdi'ill duldë. Ra cusë mal adë rúnëdi'i gan lull sino quë quërédëll bien. Nídi'i lëy narunë prohibë ra cusë rë'. ²⁴Grë ra shmënë Jesús, hia bédë'ë fin ra cusë mal rë', mal llgabë con deseo mal nananú la'ni ldu'u mieti. ²⁵Cumë ziquë quërëlda'a

por pudèrè shtë Espíritu Santo, cha guèdè'è hia'a sí, de què Espíritu Santo guèsè mè lè'è hia'a.

²⁶ Adè chu gac nadchínidi'i; adè chu napè mbidi lu sa'll; adè chu gac mè dishi'bi.

Gulè bè'nè compani sa' tè

6 Lè'è tè shmènè Jesús, si talè guèdzèlè tè tubi sa'l ldáguèll la'ni duldè, lè'è tè narsè Espíritu Santo napè què guèni'inú tè mènè ni tè parè adè tsaglá'guèdi'i gúnèll duldè. Perè gulè bè'nè ni ziquè mè nadu'u. Cadè tubi tè gapè tè cuidadè no sea què lè'l guètè'dè Satanás prèbè lè'l tè ldáguèl lu duldè. ² Gulè bè'nè compani sa'l lu grè cusè durè, cadè tubi de lè'è tè; zni gunè tè cumplir lèy shtë Cristo.

³ Si talè tubi de lè'è tè rialdí ldú'ul de què lasáquèl, iurní lu Dios lasáquèdi'il; mizmè lè'l quèsguèl lè'l. ⁴ Cadè tubi nguiu napè què gunè juzguè mizmè lè'èll, dchi'ni naquèhunè nguiu; iurní guèquitè ldú'ull por lo què naquèhúnèll. Iurní nídi'i nicidá gúnèll comparar dchi'ni shtë'nèll con dchi'ni shtë sáhi'. ⁵ Cadè tubi hia'a nápa'a narunè tucarè guèdè'na'a.

⁶ El què narsè'dè shti'dzè Dios, napè què gúnèll ayudè lè'è ra mèsè narlua'a lè'èll.

⁷ Adè rdé'di'i tè sí guèsiguè mizmè lè'è tè, ni tubi adè chu gúnèdi'i gan lu Dios parè guèsiguèll lè'è mè. Grétè' el què narcabní nguiu, ni napè què guèca'a nguiu. Lo què narunè nguiu napin cusechè despuèsè. ⁸ Si talè tubi mieti zianaldè tèchi ra deseó mal nananú la'ni ldú'ull, de mizmè

vidè mal gápèll galguti. Perè si talè zianaldè nguiu tèchi ra cusè za'què shtë Espíritu Santo, gápèll tubi cusechè por mizmè Espíritu. Guébánill parè siemprè. ⁹ Zni, adè chu cuézèdi'i gunè cusè za'què; adè chu guèdzáguèdi'i. Cha guèdè'na'a bien parè sa' hia'a purquè si talè tsaglá'ga'a shnezè mè, tubi dzè guène'e mè tubi ganza'què. ¹⁰ Por ni cadè vèsè rdchini lugar parè guèdè'na'a bien parè sa' hia'a, pues guèdè'na'a cumplir. Guèdè'na'a bien, especialmente parè ra naná rialdí ldu'i enseñansè nanapè los de más shmènè Dios.

Rialú cartè rè' con tubi saludè

¹¹ Gulè guná, naru'bè na lètrè naquèquèa'a lu tè con prupi guiahia. ¹² Grétè' naquèhunè obligar lè'è tè parè tsuté tè la'ni custumbrè shtë mè israelitè, rac shtu'u rall riuguè cuerpè shtë tè, perè nadè más runè rallin parè guèa'nè rall bien lu mènè nu parè adè guèzac zídi'i mènè lè'è rall cumè shmènè Jesucristo, el què naguti lu cruz. ¹³ Ra mènè narianaldè tèchi custumbrè rè', adè quèhúnèdi'i rall cumplir grè puntè shtë lèy perè rac shtu'u rall tsanaldè tè tèchi ra cusè ni, nadè más purquè rac shtu'u rall gac rall mè ru'bè. Rni'i nadchini rall purquè rianaldè tè tèchi rall. ¹⁴ Perè na rialdí ldua'a tubsè cusè parè gac salvara; runè nadchinia por tubsè cusè naná galguti shtë Dadè Jesucristo. Cuè mè lu cruz por na. Por mizmè cruz shtë mè ra cusè mal shtë guédchiliu, guti rahin parè na nu nahia ziquè naguti parè ra cusè ni. ¹⁵ Lu Dios adè rúnèdi'i

importë riuguë shcuérpa'a u adë
riúguëdi'in. Tubsë cusë lasac lu më
si talë na hia'a mënë nacubi por
pudërë shtë Espíritu Santo. ¹⁶Parë
grë ra narianaldë tēchi enseñansë
rë', guëga'a ldu'u më lë'ë rall
nu cuedchí ldu'u rall. Ni na rall
shmënë Dios, mënë israelitë de
verdá.

¹⁷Dizdë iurne' parë delantë adë
chu guëní'idi'i de quë nápèdia'a
derechë parë guëluá'ahia ra cusë
ni, purquë grë ra ndi'bë nanua'a
shcuérpa rlua'ain de quë Jesucristo
na Shlama.

¹⁸Lë'ë tē narialdí ldu'i Dadë
Jesucristo, rac shtua'a favurë shtë
më cuezénú lë'ë tē. Amén.